

## HSET MÒEQ DA JON

<sup>1</sup> Yiniq ma khoe i dèh enh adroe dìq dǒng, aih yiniq nhèn ma khoe tàng, yiniq mat nhèn ma khoe hnoq, yiniq nhèn ma khoe hamrìh ngan èh tì kǒng nhèn khoe jah bèq: aih nhèn anoe trùh Bàu kan rìh;

<sup>2</sup> majah qmang aih kan rìh khoe jah mahnu qnoh, nhèn i hnoq, èh nhèn qnang anoe hlài dǒq pì loq, nhèn bahìa ka oh daq loq kan rìh halình mòeq òe ma oe dèh ti Baq mahaq khoe jah patô am nhèn hnoq;

<sup>3</sup> nhèn yǒc yiniq nhèn ma khoe hnoq hu bahìa ka oh daq òeoh oh daq jah taqmùt pajùm ti nhèn. Joq qnàng nhèn i kan taqmùt pajùm ti Boc Plình aih Baq xam Kon da haq aih Chuaq Jesus Christ.

<sup>4</sup> Nhèn achìh bài yiniq kô ka oh daq, òeoh kan lem bùi nhèn jah gèh geo.

### *Kan clam cluiq xam kan qngah qngai*

<sup>5</sup> Kô raq bàu hnài nhèn ma khoe tàng enh cla haq, nhèn anoe hlài ka oh daq loq: Boc Plình aih kan qngah, enh dalam haq ùh i ka kan clam.

<sup>6</sup> Tàng joq bèn òeoh kô taqmùt pajùm ka haq, mahaq oe raq cadiang lam ta kan clam cluiq, aih bèn capoch qnùt, ùh broq tiaq trong joq qnàng.

<sup>7</sup> Mahaq tàng bèn lam ta qngah tìah ka cla haq oe ta qngah, aih bèn taqmùt pajùm ka dabau, mahim Chuaq Jesus Christ kon da haq broq hreo dìq dǒng yiniq lui bèn.

<sup>8</sup> Tàng bèn doe ðeh kô ùh lòm i ka yiniq lui cleq, aih bèn qnùt cla raðeh, kan joq qnàng ùh oe enh dalam ka bèn.

<sup>9</sup> Tàng bèn paqnoh deh yiniq lui. Haq aih la mangai ùh tablòq manoh mangai taq atoq ðòeq lêh caqnaih yiniq lui bèn rai broq bèn hreo ðiq ðong kan ùh taq atoq da bèn.

<sup>10</sup> Tàng bèn doe ðeh qnhòq lah broq cleq i yiniq lui, aih bèn broq ka haq wia mangai loq amòng, bàu haq ùh oe ta bèn.

## 2

<sup>1</sup> Yôiq wì kon yoh da au, au achìh bài yiniq kô ka pì, ðòeq pì ùh hiaq broq yiniq lui. Tàng loq i cabô broq yiniq lui, aih bèn i Mangai waiq khàn am ka bèn ajang Boc Plình, aih Chuaq Jesus Christ aih la Mangai taq atoq.

<sup>2</sup> Haq aih broq ramèn ðòeq hu baxon hlài da bèn yiniq lui, ùh xài toq da bèn hi hêq mahaq xam ðiq ka yiniq lui da crõng taneh kô.

Wèq bàu Boc Plình hnài

<sup>3</sup> Kô hagleq bèn majah loq ka raðeh khoe loq ka Haq, aih pàng bèn khoe wèq ranenh da haq!

<sup>4</sup> Cabô doe: Au loq ka Haq, mahaq ùh wèq ranenh haq, aih mangai loq qnùt, kan joq qnàng blình ùh oe ta mangai aih.

<sup>5</sup> Mahaq tàng mangai leq wèq bàu haq, aih èh kan loq waq da Boc Plình joq gêh geo ta mangai aih. Aih èh, bèn men loq ka raðeh oe ta haq.

<sup>6</sup> Cabô doe ðeh oe enh dalam haq, hadai ep broq tiah ka haq khoe broq.

<sup>7</sup> Yôiq bài oh daq au ma loq waq deh, kô ùh xài ranenh au neo achìh ònh ka oh daq, mahaq

ranenh dùnh oh daq ma khoe jah enh jò baxèm nèh raq, ranenh dùnh kô aih raq bàu oh daq ma khoe jah tàng.

<sup>8</sup> Mahaq au hadai achìh ka oh daq ranenh neo, aih trong joq qnàng enh dalam ka Chuaq xam ta oh daq, majah qmang aih kan clam cluiq khoe pi i, èh kan qngah joq qnàng khoe sreó qngah.

<sup>9</sup> Mangai leq doe ðeh oe ta kan qngah, mahaq git dèh ka oh daq, haq aih oe raq ta clam.

<sup>10</sup> Mangai leq ha-och dèh ka oh daq, haq aih oe ta kan qngah, enh dalam haq aih ùh i ka yiniq cleq ma broq ka wì qnoeq kan catoeh.

<sup>11</sup> Mahaq, cabô tagit dèh ka oh daq, aih haq oe ta nòe clam, broq toq kan clam cluiq rai ùh qnì ka raðeh qnang lam taleq, majah qmang aih kan clam khoe broq ka mat haq pi xau hnoq.

<sup>12</sup> Yôiq bài kon qyoh da au, au achìh ka pì kon, majah qmang aih yiniq lui da pì kon canòm ka yiniq Chuaq khoe jah caqnaih.

<sup>13</sup> Bài mangai ma broq baq, au achìh ka pì, majah qmang aih pì khoe loq ka Mangai ma i qmòe dèh enh jò baxèm. Bài mangai adrùh radam, au achìh ka pì, majah qmang aih pì khoe tablêq kan kiac dù.

<sup>14</sup> Yôiq kon qyoh da au, au achìh ka pì kon, majah qmang aih pì khoe loq ka Baq. Yôiq bài mangai ma broq baq, au khoe achìh ka pì majah qmang aih pì khoe loq ka Mangai ma khoe i qmòe dèh enh jò baxèm. Yôiq bài mangai radam, au achìh ka pì majah qmang aih pì aih mangai i padren, bàu Boc Plình oe enh dalam pì, èh pì hadai khe tablêq kan kiac dù.

<sup>15</sup> Apat bēh crōng taneh kô, hadai apat bēh bài dahwēq ta crōng taneh kô, majah qmang aih cabô bēh crōng taneh kô, aih èh kan loq iu yuq ka Boc Plinh ùh oe ta mangai aih.

<sup>16</sup> Majah qmang aih rīm yiniq ta crōng taneh kô: Trong xech akia ma enh, trong mat ma ònh xam trong loq catèh da qnhòng kô, dìq ùh xài loh enh Baq, mahaq loh enh crōng taneh.

<sup>17</sup> Crōng taneh kô xam kan plai da haq kô èh hnhung dìq dōng mahaq mangai maleq ma broq tiaq trong manoh Boc Plinh enh, ma aih èh ma oe mòeq òe.

### *Bài mangai tablêq hlài ka Chuaq*

<sup>18</sup> Yôiq wì kon da au, kô raq jò atiq lùch, pì kon khoe tàng doe mangai tablêq hlài ka Christ ep trùh. Wop manòeq kô i bàc ngai tablêq hlài ka Christ khoe trùh, ajang aih, bèn hu loq aih raq jò atiq lùch.

<sup>19</sup> Wì haq khoe loh enh taqne bèn, mahaq wì haq ùh mòeq bua ka bèn, majah qmang aih tàng joq wì haq mòeq bua ti bèn, aih wì khoe oe ti bèn, mahaq khoe i qmang aih òeq hu jah patô qnoh wì haq ùh mòeq bua ka bèn.

<sup>20</sup> Mahaq da pì kon, khoe jah kan xùt dầu enh Mangai Hadròeh, aih khoe jah loq rīm yiniq.

<sup>21</sup> Au achih ka pì kon aih ùh xài pì ùh qnì kan joq qnàng, mahaq taiq pì loq kan joq qnàng, pì loq ùh i ka kan patiah loh enh kan joq qnàng.

<sup>22</sup> Cabô ma capoch qnùt? aih ma ùh xài bài mangai ma doe Jesus aih ùh xài Christ? Aih raq Mangai ma tablêq hlài ka Christ, aih bài mangai ma doe ùh i ka Baq, ùh i ka Kon!

<sup>23</sup> Cabô ma hangah đac Kon, mangai aih ùh i ka Baq, mangai leq doe đeh loq ka Kon mangai aih hadai loq ka Baq.

<sup>24</sup> Da pì kon, trong pì ma khoe tàng enh jò baxèm ep oe yôt enh dalam ka pì. Tàng joq yiniq pì kon ma khoe tàng qmòe enh jò baxèm oe yôt ta pì, aih èh pì kon hadai jah oe ta Kon xam ta Baq.

<sup>25</sup> Bàu cla Haq ma khoe têu am ka bèn, aih raq kan rih halinh mỏeq đoe.

<sup>26</sup> Au achìh ka pì kon bài yiniq kô aih đoeq anoe trùh bài mangai ma loq qnút pì kon.

<sup>27</sup> Da pì kon manòeq kô, dầu pì ma khoe jah xút enh Chuaq dua oe raq enh dalam pì, qmang aih pì cabô ep hnài cleq hòm, mahaq kan xút dầu da haq jah hnài pì rìm trong, kan xút dầu aih joq qnàng ùh xài kan paqnút, qmang aih thê pì oe ta dalam haq, tiaq qmang ka bài bàu hnài pì ma khoe jah tàng.

### *Kon qyoh da Boc Plình*

<sup>28</sup> Qmang aih manòeq kô, yôiq wì kon qyoh da au, drah oe enh dalam ka haq, đoeq jò haq trùh, bèn jah bình kan cajap manoh, ùh hìaq ep crè xep ta kan camaih jò haq trùh.

<sup>29</sup> Tàng pì loq haq aih kan taq atôq, aih hadai ep loq mangai leq broq tiaq kan taq atôq, aih mangai ma ha-uang loh enh haq.

## **3**

<sup>1</sup> Ngan beq, Boc Plình khoe patô qnoh kan haq loq waq ka bèn bác dàng leq, loh qmòe ka jah creo ka bèn aih kon da Boc Plình, bèn joq kon da haq

joq qnàng. Aih iq dài crông taneh kô ùh loq ka bèn majah qmang aih wì qnhòq lah qnì ka haq.

<sup>2</sup> Yôiq oh daq au ma loq waq, manòeq kô bèn kon da Boc Plinh, mahaq tabla èh bèn qmang leq cadèh, trong aih qnhòq jah paqnoh. Bèn loq jò haq trùh, bèn jah tiàh wop qmang ka haq, majah qmang aih bèn jah hnoq haq qmang ka cla haq.

<sup>3</sup> Cabô i kan tangèh aih ta manoh, ep broq ka raðeh jah hadròeh tiàh ka haq.

<sup>4</sup> Mangai leq ma broq yiniq lui, aih broq kan pagau ka ranenh, majah qmang aih yiniq lui aih la kan pagau ka ranenh.

<sup>5</sup> Mahaq pì loq, Chuaq Jesus Christ khoe trùh ðòeq hu dèch ðac yiniq lui, ta dalam haq ùh lòm i qmòe ka yiniq lui cleq.

<sup>6</sup> Cabô oe enh dalam haq mangai aih ùh broq yiniq lui. Mangai leq ma broq yiniq lui, aih mangai qnhòq lah hnoq ka haq, qnhòq hmaq loq ka haq.

<sup>7</sup> Wì kon qyoh da au, apaq ðòeq cabô qnùt raðeh: Mangai broq kan taq atoq aih mangai ma taq atoq, tiàh ka cla Chuaq aih taq atoq.

<sup>8</sup> Mangai leq ma broq yiniq lui aih da kan kiac dù, majah qmang aih kiac dù broq yiniq lui qmòe enh jò baxèm. Kon da Boc Plinh khoe loh ðòeq raliang ðac biac broq da kan kiac.

<sup>9</sup> Ùh i cabô ha-uang loh enh Boc Plinh ma oe raq broq yiniq lui hòm, majah qmang aih pliàng adrech da Boc Plinh oe ta haq, haq pì oe jah broq yiniq lui hòm, majah qmang aih haq khoe ha-uang loh enh Boc Plinh.

<sup>10</sup> Ajang aih, wì majah canau loq kon da Boc Plinh xam kon da kiac dù: Cabô ùh broq kan taq atog aih ùh xài da Boc Plinh, mangai ma ùh qnì ha-och dèh ka oh daq hadai qmang aih.

<sup>11</sup> Majah qmang aih, kô bàu pì kon ma khoe tàng qmòe enh jò baxèm: Bèn ep loq waq ka dabau.

<sup>12</sup> Apaq tiah ka Ca-in, mangai da kiac dù, ma khoe jêh đac deh oh. Gleq haq ma jêh đac deh oh? Majah qmang aih haq broq trong dù, da oh haq aih broq trong taq atog.

<sup>13</sup> Qmang aih oh daq da au, pì ùh dùh hamàih dèh tàng joq crông taneh kô tagit ka pì.

<sup>14</sup> Bèn loq ka rađeh khoe clech ka kan cachit òoq trùh ta kan rìh, majah qmang aih, bèn loq ha-och deh ka oh daq. Mangai leq ùh qnì loq waq haq aih oe raq ta kan cachit.

<sup>15</sup> Cabô git dèh ka oh daq aih mangai jêh mangai, oh daq loq ùh i mòeq ngai leq jêh đac mangai ma i kan rìh halinh oe ta haq.

<sup>16</sup> Ajang kô bèn jah canau kan loq waq: Chuaq Jesus khoe cađac dèh kan rìh am ka bèn, dài bèn majah hadai ep cađac dèh kan rìh am ka oh daq.

<sup>17</sup> Tàng mangai leq i kùng hang ta qnhòng kô, haq hnoq dèh oh daq qnang nanxa mahaq ùh lòm tamèt ha-och ka wì, aih èh kan loq waq da Boc Plinh oe ta mangai qmang leq majah!

<sup>18</sup> Yôiq wì kon qyoh da au, bèn apaq loq waq toq xi bàu dech ajang goe rapet, mahaq xam yiniq broq tiaq manoh joq qnàng.

<sup>19</sup> Aih èh, bèn loq ka rađeh joq oe ti bàu joq qnàng, jah cajap manoh enh ngèa haq.

<sup>20</sup> Tàng joq manoh cliac bèn trech bèn, aih èh Boc Plình kàn yeo hnau ka manoh cliac bèn hòm, haq loq rìm ka yiniq.

<sup>21</sup> Yôiq oh daq da au, tàng joq manoh cliac bèn ùh hiaq trech bèn, aih èh bèn jah cajap manoh òòeq hu thia ten ka Boc Plình,

<sup>22</sup> aih èh yac ka bòch cleq, dua bèn jah, majah qmang aih bèn wèq tiaq bàu haq thê rai broq lem ka manoh haq.

<sup>23</sup> Manòeq, kô bàu da haq thê: Bèn ep lùì yiniq Kon da haq, aih Chuaq Jesus Christ, èh bèn hadai ep loq waq ka dabau qmang ka bàu haq hnài bèn.

<sup>24</sup> Mangai leq iu tiaq bàu haq thê, aih jah oe ta dalam Boc Plình, èh Boc Plình hadai oe ta mangai aih, bèn majah loq haq oe ti bèn, aih canòm ka Yiang Hadròeh da haq ma khoe am ka bèn.

## 4

### *Apaq lùì dõng rìm yiang*

<sup>1</sup> Oh daq da au, apaq lùì dõng rìm yiang, mahaq ep qnhro ngan hu canau rìm yiang aih ajoq trùh enh Boc Plình, majah qmang aih i bàc ngai pajàu patiah khoe trùh ta crõng taneh kô.

<sup>2</sup> Qmang kô òòeq hu canau ka Yiang da Boc Plình: Yiang leq ma doe Chuaq Jesus Christ yõc chac mangai òòeq hauang loh ta crõng taneh kô, yiang aih trùh enh Boc Plình.

<sup>3</sup> yiang ma chàih cađac Christ, yiang aih ùh xài trùh enh Boc Plình. Aih raq yiang da mangai ma tablêq hlài ka Christ, pì kon ma khoe tàng doe haq trùh ta ngèa kô èh, manòeq kô khoe oe ta wì phù cròng.



<sup>4</sup> Yôiq wì kon da au, pì kô aih da Boc Plình, khoe blêq wì aih, majah qmang aih Mangai ma oe ti pì aih yeo kàn diq dõng ka wì ma oe ta crõng taneh kô.

<sup>5</sup> Wì haq aih da crõng taneh kô, capoch tìah ka crõng taneh dài wì phù cròng majah dì bàu wì haq.

<sup>6</sup> Bèn aih da Boc Plình: mangai leq loq ka Boc Plình aih èh haq tamàng bèn, mangai leq ùh xài da Boc Plình, aih èh haq ùh tamàng bèn. Aih bèn hu canau ka yiang bàu joq qnàng xam yiang paqnùt.

### *Kan loq waq da Boc Plình*

<sup>7</sup> Oh daq da au, bèn drah loq waq ka dabau, majah qmang aih kan loq waq trùh enh Boc Plình, mangai leq loq waq, mangai aih ha-uang loh enh Boc Plình, loq ka Boc Plình.

<sup>8</sup> Mangai ùh qnì waq, aih haq ùh qnì ka Boc Plình, majah qmang aih Boc Plình aih kan loq waq.

<sup>9</sup> Manoh Boc Plình loq waq ka bèn khoe paqnoh ajang kô: Boc Plình khoe thê dèh Kon mòeq da haq loh ta crõng taneh, dõq bèn canòm ka Kon aih òeq hujah rìh.

<sup>10</sup> Kan loq waq oe ajang kô: ùh xài bèn khoe loq waq ka Boc Plình, yàng haq ma khoe loq waq ka bèn, haq thê dèh Kon broq ramèn baxon hlài da bèn yiniq lui.

<sup>11</sup> Yôiq oh daq au, tàng joq Boc Plình khoe loq waq ka bèn qmang aih, aih bèn hadai ep loq waq ka dabau.

<sup>12</sup> Qnhòq i cabô lah hnoq Boc Plình, tàng bèn loq waq ka dabau, aih Boc Plình oe enh dalam bèn, èh kan loq waq haq jah gèh geo enh dalam ka bèn.

<sup>13</sup> Ajang kô bèn loq ðeh oe enh dalam ka haq èh haq hadai oe enh dalam ka bèn: Aih haq khoe am Yiang Hadròeh haq ka bèn.

<sup>14</sup> Nhèn khoe hnoq rai khoe panhìn rameh: Boc Plình aih Baq khoe thê deh Kon trùh ðòeq wìa Mangai dèch mangai ta crông tanèh kô.

<sup>15</sup> Tàng i mangai leq doe: Chuaq Jesus aih Kon da Boc Plình, aih èh Boc Plình oe enh dalam wì aih, wì aih hadai oe ta dalam Boc Plình.

<sup>16</sup> Bèn khoe loq rai lùì kan Boc Plình loq waq ka bèn. Boc Plình aih kan loq waq, mangai leq oe ta kan loq waq aih haq oe ta dalam Boc Plình, èh Boc Plình hadai oe ta haq aih.

<sup>17</sup> Canòm ajang aih, kan loq waq men jah gèh geo ta bèn, ðòeq manoh bèn jah cajap ta hì hadrah: majah qmang aih oe ta crông tanèh kô Chuaq Jesus qmang leq bèn hadai qmang aih.

<sup>18</sup> Blình ùh i kan yùq crè ta kan loq waq, mahaq kan loq waq gèh geo doeh ðac kan yùq crè, majah qmang aih kan yùq crè i kan baxa, mangai ma yùq crè ùh jò leq jah gèh geo ta kan loq waq.

<sup>19</sup> Bèn loq waq, aih pàng Chuaq ma khoe loq waq ka bèn adroe.

<sup>20</sup> Tàng i cabô doe ðeh loq waq ka Boc Plình, mahaq tagit deh ka oh daq, aih mangai loq qnùt, majah qmang aih mangai ma ùh ha-och ka oh daq haq ma hnoq xi mat, aih ùh jò leq haq loq waq ka Boc Plình haq ma ùh xau hnoq.

<sup>21</sup> Bèn khoe jah enh haq bàu hnài kô: Cabô loq waq ka Boc Plình aih hadai ep loq waq dèh ka oh

daq.

## 5

<sup>1</sup> Cabô lùì Chuaq Jesus aih raq Christ, haq aih ha- uang loh enh Boc Plình, cabô loq waq ka Boc Plình aih èh hadai loq waq ka kon da haq.

<sup>2</sup> Qmang kô bèn jah loq ka rađeh loq waq ka wì kon da Boc Plình, aih jò bèn loq waq ka Boc Plình rai wèq gèh ka ranenh da haq.

<sup>3</sup> Kan loq waq ka Boc Plình aih rameh: wèq tiaq ranenh haq thể. Ranenh da haq aih ùh xài kan trap,

<sup>4</sup> majah qmang aih mangai leq ma ha- uang loh enh Boc Plình, aih jah blêq crông taneh kô, kan blêq crông taneh kô aih la manoh lùì da bèn.

<sup>5</sup> Cabô ma blêq crông taneh kô, aih ma ùh xài mangai ma lùì Chuaq Jesus aih kon Boc Plình qmòh?

<sup>6</sup> Chuaq Jesus aih Mangai ma khoe yốc diac xam mahim đòeq hu trùh, ùh xài toq xi diac hi hêq, mahaq xam diac xam mahim.

<sup>7</sup> Yiang Hadròeh khoe panhìn qmang aih, majah qmang aih Yiang Hadròeh aih raq bàu joq qnàng.

<sup>8</sup> Majah qmang aih, i piq kan panhìn qmang kô: Yiang Hadròeh, diac, èh xam mahim; piq aih broq mòeq.

<sup>9</sup> Tàng bèn jah kan panhìn enh kon mangai mahaq kan panhìn da Boc Plình aih yeo haqn hèq hòh; majah qmang aih Haq panhìn dèh Kon haq.

<sup>10</sup> Cabô lùì Kon da Boc Plình, haq i kan panhìn aih ta chac rađeh, mangai leq ma ùh lùì Boc Plình, aih haq doe Boc Plình loq amòng, majah qmang

aih haq ùh lùì bàù Boc Plình ma khoe panhìn deh Kon.

<sup>11</sup> Kan panhìn rameh: Boc Plình khoe am kan rìh halình mòeq òòe ka bèn, kan rìh aih oe enh dalam Kon haq.

<sup>12</sup> Cabô i Kon, aih haq i kan rìh, cabô ma ùh i ka Kon Boc Plình, haq aih ùh i ka kan rìh.

<sup>13</sup> Au achìh bàì bàù kô òòeq pì kon aih bàì mangai ma lùì yiniq Kon da Boc Plình loq òòeh i kan rìh halình mòeq òòe.

<sup>14</sup> Kô yiniq ma broq ka bèn cajap manoh òòeq hu thia haten ka Boc Plình: Tàng bèn waiq khàn tiaq manoh haq enh, aih yac ka bèn bòch cleq dua haq tamàng bèn.

<sup>15</sup> Tàng bèn loq haq tamàng bèn yac ka bèn bòch cleq, aih bèn loq òòeh khoe jah yiniq bèn ma bòch haq.

<sup>16</sup> Tàng bèn hnoq oh daq broq yiniq lui, mahaq qnhòq troq ka cahìt, aih drah waiq khàn beq, aih èh Boc Plình am wì rìh, aih am ka bàì mangai ma broq yiniq lui mahaq qnhòq troq ka cachìt. I dìq yiniq lui ma troq ka cachìt, au ùh i thê pì waiq khàn ka yiniq lui qmang aih.

<sup>17</sup> Rìm kan ùh taq atoq aih dìq yiniq lui; mahaq i yiniq lui qnhòq hiaq troq ka cachìt.

<sup>18</sup> Bèn loq mangai leq ha-uang enh Boc Plình aih èh ùh hiaq broq yiniq lui; mahaq mangai ma ha-uang loh enh Boc Plình ep wèq cla raòeh, kiac dù ùh habo cleq ka haq jah.

<sup>19</sup> Bèn loq òòeh kô aih kon qyoh da Boc Plình, wì phù cròng ta cròng taneh dìq oe enh qneq ka cwàng da kiac dù.

<sup>20</sup> Bèn loq Kon Boc Plình khoe trùh, haq am ka bèn kan loq đòeq bèn canau ka haq aih Boc plình joq qnàng, oe enh dalam Kon da haq aih la Chuaq Jesus Christ. Haq aih raq Boc Plình joq qnàng xam kan rih halinh mòeq đòe.

<sup>21</sup> Yôiq wì kon qyoh da au, wèq rađeh ma khoe ka radua qmù oq.

**Hset Hadròeh**  
**The New Testament in the Hre language of Vietnam,**  
**translated by Baq Thi**

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

---

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d